

Endlich kan man auch dieses mercken/wann man ein Irregular Orth fortificirn sol/ kan man nach einerley Maßstab etliche Regular Vestungen reißen/ des gegebenen Orths abriß nehmen/ vnd sehen zu welcher Regular sichs am besten schicken/ vnd also auß dem Irregular Orth ein regular mache/ wo fern es sonst die gelegenheit leiden will.

CAPUT 16.

Von anlegung eines Castels an einer Stadt.

In Castel muß an eine Stadt also angelegt werden/ daß es ins Feld einen freyen Paß habe/ vnd man in die Stadt vnversehens Volk bringen könne/ auch der Stadt schaden zufügen/ vnd sich selber defendirn, darumb soll die Stadt gegen dem Castel offen seyn/ auch keine Häuser auff 400. Schuh nahe darbey gebawet werden/ sondern frey liegen/ vnd also/ daß man darauff in die Gassen hinein sehen vnd flangiren möge. Wann aber ein Wasser an einer Stadt hingehet/ soll man das Castel oben an den fluß legen/ damit man in rebellionszeiten was herab kömmt vnd der Stadt soll zugeführt werden/ könne aufffangen.

Die Castel können seyn von 4. 5. 6. oder 7. Bollwerken wie wol die von 4. sich nicht wol schicken an die Stadt anzulegen/ aber die von 5. seynd gantz bequem vnd gut darzu.

Abriß